

四庫全書

子部

欽定四庫全書

冊府元龜卷七百七十一

宋王欽若等撰

總錄部

世官

傳曰世不失職又曰世濟其美不隕其名蓋古之守官者修其方而垂裕宿其業以延嗣義訓攸篤軌迹彌劬故能介象賢之祉成善繼之名復治先職以載名譽至有官守無改故吏多在規度斯覲流風相接出處更踐

德聲宣聞系緒積累慶靈綿久自非恪居之績可述惟  
肖之質無忝茂昭前烈以塞羣望者又曷能免世祿之  
議哉至有代諸父之任踵伯仲之武皆可類舉亦并而  
叙焉

重黎帝嘗時居火正甚有功能光融天下帝嘗命曰祝  
融祝火也始也融明也共工氏作亂帝嘗使重黎誅之而不盡帝

乃以庚寅日誅重黎而以其弟吳回為重黎後復居火  
正為祝融

周造父為繆王御西巡狩見西王母樂之忘歸而徐偃  
王反繆王日馳千里馬攻徐偃王大破之乃賜造父以  
趙城自造父下六世至奄父曰公仲宣王時伐戎為御  
鄭桓公武公父子並為周司徒善於其職國人宜之故  
美其德賦緇衣之詩以明有國善善之功焉

觀從楚大夫也平王立

平王名棄疾

召觀從曰惟爾所欲

從

初教王比殺棄疾棄疾今名用之明在君為君之義

對曰臣之先佐開卜乃使為

卜尹

佐卜人開龜兆

漢周勃以將軍從高帝遷為太尉後以列侯事惠帝惠  
帝六年置太尉官以勃為太尉文帝即位以勃為右丞  
相居十餘月請歸相印許之十餘歲丞相陳平卒復用  
勃為相子亞夫為中尉景帝三年吳楚反亞夫為太尉  
東擊吳楚破平歸復置太尉官五歲遷為丞相

金日磾字翁叔封秬侯有忠勤之節七葉為侍中

石奮官至大中大夫東陽侯張相如為太子太傅免選  
可為傅者皆推奮為太子太傅武帝元狩元年立太子

選羣臣可為傅者奮子慶自沛守為太子太傅

汲黯字長孺其先有寵於古之衛君

六國時衛弱但稱君也

至黯

十世世為卿大夫

杜周武帝時為御史大夫子延年宣帝五鳳中徵為御史大夫居父官府不敢當舊位坐卧皆易其處

韋賢為丞相子玄成復以明經歷位至丞相故鄒魯諺曰遺子黃金滿籬不如一經

平當為丞相當子晏以明經歷位大司徒漢興惟韋平

父子至宰相

漢安帝更名丞相為大司徒

劉德長樂衛尉辟疆之子也德昭帝初為宗正丞雜治

劉澤詔獄

雜謂以他官共治之也劉澤孝齊王之孫謀欲叛殺青州刺史者也

父為宗正

徙大鴻臚丞遷大中大夫後復為宗正雜案上官氏蓋

主事德子向本名更生元帝即位前將軍蕭望之諸吏

光祿大夫周堪薦更生宗室忠直明經有行擢為散騎

宗正給事中又德傳爵至孫慶忌復為宗正太常薨子

岑嗣為法曹中郎將列校尉至太常

史高為侍中貴幸子丹以父位為中庶子元帝即位為駙馬都尉侍中九男皆以丹任為侍中

馮野王與弟立相代為上郡太守吏民嘉美歌之曰大馮君小馮君兄弟繼踵相因循聰明賢智惠吏民政如魯衛德化均周公康叔猶二君

後漢鮑永建武中為司隸校尉其子昱中元初拜司隸校尉詔昱詣尚書使封胡降檄光武遣小黃門問昱有所怪不對曰臣聞故事通官文書不著姓名今司徒露



布怪使司隸下書而著姓也帝報曰吾固欲令天下知忠臣之子復為司隸也豈在職奉法守正有父風

馮魴字孝孫父子兄弟並帶青紫三代侍中

郭躬為廷尉家世掌法弟子鎮又為廷尉鎮子賀復至廷尉賀弟禎亦以能法律至廷尉鎮弟子禧少明習家業兼好儒學有名譽亦為廷尉

廉范趙將廉頗之後也漢興以廉氏豪宗自苦陘徙馬世為邊郡守

陳寵為尚書子忠辟司徒府三遷廷尉正司徒劉愷舉忠明習法律宜備機密於是擢尚書使居三公曹

趙興為司隸校尉子峻為太傅以才器稱孫安世曾相三葉皆為司隸時稱其盛

袁安章帝元和三年代第五倫為司空章和元年代桓虞為司徒安子京京子湯桓帝初為司空累遷司徒太尉湯子逢靈帝立為司空又安子敞安帝元初三年代劉愷為司徒

王龔字伯宗安帝建光初為司隸校尉累遷太常順帝  
永建四年為司空子暢字叔茂少以清實見稱為齊相  
徵拜司隸校尉靈帝建寧初為司空

楊震安帝永初四年徵入為太僕遷太常永寧元年代  
劉愷為司徒延光二年又代愷為太尉中子秉桓帝時  
為光祿大夫梁冀專權秉稱病六年冀誅後乃拜太僕  
遷太常後代劉矩為太尉秉子賜靈帝熹平二年代唐  
珩為司空五年代袁隗為司徒免光和元年為太常五

年冬為太尉免中平二年復代張溫為司空于彪中平  
六年代董卓為司空其冬代黃琬為司徒免從入關為  
太常免又代淳于嘉為司空免復拜太常獻帝興平元  
年代朱雋為太尉錄尚書事

魏劉馥為揚州刺史馥子靖文帝黃初中從黃門侍郎  
遷廬江太守詔卿父昔任彼州今卿復據此郡可謂克  
負荷者也

章端從涼州牧徵為太僕子康代為涼州刺史時人榮

之

杜畿為河東太守子恕復為太守恕所在務存大體而已其樹惠愛益得百姓歡心不及於畿

辛毗為衛尉子敞官至衛尉

盧毓為僕射典選舉子欽為尚書僕射領選

蜀呂祥子及孫世為永昌太守

吳孫隣字公達雅性精敏幼有令譽九歲代父貴領豫

章

朱才為校尉領兵後弟亦以校尉領兵

周瑜字公瑾從祖父景子忠皆為漢太尉

顧潭祖父雍為丞相平尚書事卒數月拜潭太常代雍  
平尚書

晉山濤武帝咸寧中除尚書僕射領吏部子簡懷帝永  
嘉初為尚書左僕射領吏部

何曾子劭為侍中尚書劭庶兄遵為侍中遵子綏為侍  
中尚書

虞悝與弟望並有士操孝悌廉信為鄉黨所稱而俱好  
臧否以人倫為己任少仕州郡兄弟更為治中別駕

杜軫成都人為犍為太守甚有聲譽當遷會病卒弟烈  
明政事察孝廉歷平康安陽令所居有異績遷衡陽太  
守聞軫亡因自表兄子幼弱求去官詔轉犍為太守蜀  
士榮之

謝奕從兄尚為豫州刺史尚有德政既卒為西藩所思  
朝議以奕立行有素必能嗣尚事乃遷都督豫司冀并

四州軍事安西將軍豫州刺史

滕修為安南將軍廣州牧後修孫含為平南將軍廣州  
刺史在任積年甚有威惠

袁猷少與兄瓌齊名代瓌為呂令復相繼為江都令繇  
是俱渡江

陶璜父基為吳交州刺史璜復為交州牧在州三十年  
威恩著於殊俗後璜子威領刺史在職甚得百姓心三  
年卒威弟淑子綏後並為交州自基至綏四世為交州



者五人

薛兼字令長清素有器宇資望故如上國不似吳人歷位二宮丞相長史元帝踐祚累遷太子少傅自綜至兼三世傳東宮

周訪為南中郎將督梁州諸軍梁州刺史卒子撫後為益州刺史穆帝永和初進督梁州之漢中巴西梓潼陰平四郡軍事升平中進鎮西將軍在州三十餘年哀帝興寧三年卒子楚起家叅征西將軍事從父入蜀拜鷹

揚將軍捷為太守父卒以楚監梁益三州假節襲爵建  
城公世世在梁甚得物情撫弟光少有父風光子仲孫  
興寧初為寧州刺史桓溫以梁益多寇周氏世有威稱  
復除仲孫監益州梁州之三郡自訪以下三世為益州  
棗據善文辭為太子中庶子子嵩字臺產才藝尤美為  
太子中庶子

祖約逖之弟也逖有功於譙沛約漸見任遇逖卒自侍  
中代逖為平西將軍豫州刺史領逖之衆

庾闡能屬文為給事中領著作其子肅之亦有文藻著稱歷給事中

徐苗字叔胄累世相承皆以博士為郡守

鄧嶽字伯山督交廣二州軍事建武將軍平越中郎將廣州刺史假節加平南將軍卒嶽弟逸字茂山亦有武幹嶽卒後以逸監交廣二州建威將軍平越中郎將廣州刺史假節

孔愉為會稽內史卒於山陰之私第後其子孔國孫靜

並再為會稽內史

王珉父洽嘗為中書令至珉復居之時人以為奕世令望

孔嚴為吳興太守善於宰牧甚得人和後從姪廞廞子琳之並為吳興太守

丁潭為散騎常侍子話後亦至散騎侍郎

桓石秀代叔父冲為寧遠將軍江州刺史領鎮蠻護軍西陽太守在州五年以疾去職其弟石民為梁郡太守

時叔父冲鎮荊州及冲薨詔以石民監荊州軍事西中郎將荊州刺史桓氏世莅荆土石民兼以才望甚為人情所仰

宋陸仲元者晉太尉玩曾孫以事用見知歷吏部郎右衛將軍侍中吳郡太守自玩洎仲元四世為侍中時人方之金張二族

殷淳曾祖融祖元並為晉太常淳歷中書黃門侍郎淳弟冲亦歷中書黃門吏部郎冲弟淡亦歷黃門吏部郎

張暢為侍中子淹代領太子右衛率

毛虎生及子璩並為益州刺史

王淮之任宋臺御史中丞為僚友所憚淮之父納之祖  
臨之曾祖彪之自彪之至淮之四世並居此職

何偃為吏部尚書父尚之去選未五載偃復襲其職世  
以為榮

杜驥為冀州刺史徵拜左軍將軍兄坦代為刺史北土  
以為榮

杜弘文交州刺史慧度子也弘文初為九真太守及繼父為刺史亦以寬和得衆襲爵龍編侯

朱修之為司徒從事中郎文帝謂之曰卿曾祖昔為王導丞相中郎卿今又為王宏中郎可謂不忝爾祖矣

南齊柳世隆元景弟之子也出為虎威將軍上庸太守帝謂元景曰卿昔以虎威之號為隋郡今復以授世隆使卿門世不絕公也

沈淡與弟淵沖並歷御史中丞

又云中丞案裁之職被憲者多結怨母孔氏在

東隣家失火疑為人所焚藝大呼曰我  
三兒皆作御史中丞與人豈有善者

顧憲之為給事中黃門侍郎兼尚書吏部郎中宋世其  
祖覲之嘗為吏部庭植嘉樹謂人曰吾為憲之種耳至  
是憲之果為此職

傅琰字季珪山陰令僧祐子也宋明帝泰始六年琰又  
為山陰東土大縣難為官長僧祐在縣有稱琰尤以明  
察著名琰父子並著奇績江左鮮有匹云諸傳有治縣  
譜子孫相傳不以示人



梁謝覽為吏部尚書覽自祖至孫三世居選部當世以  
為榮

劉季連為輔國將軍益州刺史季連父宋世為益州貪  
鄙無政績州人猶以義故善待季連季連下車存問  
故老撫納新舊見父時故吏故吏皆對之流涕

蕭昂字子明景之第三弟也武帝天監初為輕車將軍  
監南兖州初景再為兖州德惠在人及昂來代時人方  
之馮氏

夏侯夔為豫州刺史夔兄曾先經此任至是夔居焉兄  
弟並有恩惠於鄉里百姓歌之曰我之有州頻仍夏侯  
前兄後弟布政優優夔在州七年甚有聲績遠近多附  
之

謝舉為五兵尚書遷掌吏部舉祖莊宋世再典選至舉  
又三為此職前代未有也又遷侍中中書監未拜遷太  
子詹事翊左將軍舉父滄齊世終此官累表乞改授勅  
不許久之受職

到沆為洗馬管東宮書記散騎省天監三年詔尚書郎  
在職清能或人才高妙者為侍郎以沆為殿中曹侍郎  
沆從父兄漑洽並有才名時皆相代為殿中當世榮之  
王承除國子祭酒承祖儉及父暕嘗為此職三世為國  
師前代未之有也當世以為榮

孔僉歷官國子助教三為五經博士子元素頗涉文學  
官至太學博士

沈峻為五經博士卒子文阿傳父業尤明左氏傳太清

中繇國子助教為五經博士

陳袁憲為左僕射叅掌選事先是憲長兄樞為左僕射至是為右僕射臺省目樞為大僕射憲為小僕射朝廷榮之

賀德基字承業世傳禮學祖文發父淹仕梁俱為祠部並有名當世德基於禮記稱為精明累遷尚書祠部德基雖不至大官而三世儒學俱為祠部時論美其不墜

焉

樊毅南陽人也隸王僧辯討河東王蕭譽以功除假節  
威戎將軍右中郎將代兄俊為梁興太守

後魏庾業延父及兄和辰世典畜牧

司馬楚之為侍中鎮西大將軍開府雲中鎮大將朔州  
刺史琅邪王楚之尚魏諸女河內公主生子金龍後襲  
爵拜侍中鎮西大將軍開府雲中大將朔州刺史金龍  
弟躍字寶龍尚趙郡公主拜駙馬都尉代兄為雲中鎮  
將朔州刺史楚之父子相繼鎮雲中朔土服其威德

辛穆與其子馥並為平原相吏民懷安之

韋肅為荆郢和糴大使南郢州刺史丑夷啓稱肅父珍  
往任荆州恩洽夷夏乞肅充南道將別領荆州驍勇共  
為腹背詔從之

皮豹子為都督秦雍荆梁益五州諸軍事開府仇池鎮  
將豹子子喜高祖初拜侍中都督秦雍荆梁益五州諸  
軍事開府仇池鎮將以其父豹子昔鎮仇池有威信故  
也

楊津華陰人為右將軍華州刺史與兄播前後皆牧本州當世榮之

畢衆敬為兗州刺史子元賓後亦為兗州刺史父子相代為本州當世榮之

邢祐假員外散騎常侍使于宋祐子產復假員外散騎常侍使于南齊仍世將命時人美之

傅敬和豎眼長子也豎眼前為益州刺史敬和孝莊時復為益州刺史朝廷以其父有遺惠故也

江文遙為汝州刺史卒于州長史許思祖等以文遙遺  
愛在民復推其子果行州事既攝州任乃遣使奉表莊  
帝嘉之除果通直散騎侍郎假節龍驤將軍行汝州事  
北齊鄭述祖為兗州刺史初其父道昭為兗州於彭城  
南小山起齋亭刻石為記述祖時年九歲及為刺史往  
尋舊迹得一破石有銘云中嶽先生鄭道昭之白雲堂  
述祖對之嗚咽悲動羣寮

後周泉企上雒豐陽人曾祖景言任魏假宜陽郡守世



龔本縣令父安志復為宜陽郡守領本縣令企年十二鄉人皇平陳合等三百人詣州請企為縣令州為申上時吏部尚書郭祚以企年少未堪宰民請別選遣終此一限令企代之宣武詔曰企向成立且為本鄉所樂何為捨此世龔更求一限遂依所請

李旭為黃門侍郎太祖嘗謂旭曰卿祖昔在中朝為御史中尉卿操尚貞固理應不墜家風但孤以中尉彈劾之官愛憎所在故未即投耳然此職久曠無以易卿乃

奏旭為御史中尉

裴文舉遂之子也武帝保定三年遷絳州刺史遂之莅  
正平也以廉約自守每行春省俗單車而已及文舉臨  
州一遵其法百姓美而化之

奚達武為大宗伯父震嘗為此職時論榮之

于翼為渭州刺史翼兄實嘗莅此州頗有惠政翼又推  
誠布信事存寬簡夷夏感悅比之大小馮君焉

隋田式字顯標馮翼下邳人也祖安興父長樂仕魏俱

為本郡太守式仕周又為本郡太守親故屏迹請託不行武帝聞而善之

庾季才為大中大夫藝術精通子質復為太史令質子儉亦傳父業兼有學識仕歷襄武令元德太子學士義寧初為太子令

唐漢陽王瓌高祖武德中代兄孝恭為荊州都督

溫彥博歷中書侍郎時弟彥將亦為中書侍郎

趙道興貞觀中為左武侯中郎將隋武侯大將軍才之

子也明閑宿衛號為稱職太宗嘗謂曰卿父為隋武侯將軍甚有當官之譽卿今克傳弓冶可謂不墜家聲因擢授右武侯將軍其父時廨宇仍舊不改時人以為榮盧承慶博學有才幹貞觀中歷雍州別駕尚書左丞弟承業亦有才幹與承慶相次為尚書左丞雍州刺史時人榮之

李百藥德林子也百藥貞觀元年為中書舍人子安期高祖永徽中為中書舍人自德林至安期三世皆掌制

誥安期孫萬冲又為中書舍人

戴胄貞觀中為民部尚書以本官參預朝政胄兄子至德乾封中累遷西臺侍郎同東西臺三品轉戶部尚書依舊知政事父子十數年間相繼為尚書皆預知國政時以為榮

崔仁師貞觀中為中書舍人累遷中書侍郎平章事子湜中宗景龍中為中書舍人再為中書侍郎平章事

蕭均貞觀中為中書舍人有名於時均曾姪孫嵩開元

初為中書舍人嵩子華肅宗上元初拜中書侍郎平章事華孫復建中末吏部尚書平章事華子恆恆子俛穆宗初為中書侍郎平章事尋轉門下侍郎嘗弟悟子倣懿宗咸通末為兵部侍郎平章事

閻立本工部尚書立德之弟也高宗顯慶中立本自將作大匠遷拜工部尚書兄弟相代時人榮之

薛元超隋內史侍郎道衡孫也元超高宗朝為中書舍人中書省有一盤石初道衡為內史侍郎嘗踞而草制

元超每見此石未嘗不泫然流涕肅宗上元三年復為中書侍郎元超從子稷睿宗景雲中又為中書侍郎

韓休伯父大敏則天初為鳳閣舍人休歷遷中書舍人禮部工部侍郎知制誥休子法亦歷知制誥休孫臯德宗朝為考功郎中知制誥遷中書舍人臯父滉代宗大歷中為尚書左丞臯德宗貞元末為尚書右丞滉弟洄興元初為京兆尹臯貞元十四年為京兆尹

張說則天初為鳳閣舍人子均玄宗朝為中書舍人

姚璿與弟班數年間俱為定州刺史戶部尚書時人榮之

房頴叔則天聖歷中為天官侍郎自其高祖景伯至頴叔四代咸居選部時論榮之

韋承慶弟嗣立長壽中代承慶為鳳閣舍人長安三年承慶又代嗣立為天官侍郎頃之又代嗣立知政事當時以為榮

劉知幾長安中累遷左史修國史開元初遷左散騎常



侍子貺餽秩貺終於起居郎修國史餽累為給事中尚書左丞左散騎常侍秩給事中尚書右丞

李景伯中宗景龍中為給事中子彭年玄宗開元中又遷給事中

王維與弟縉以詞學齊名玄宗開元初縉為監察御史天寶初維亦為監察御史

賈曾初為中書舍人以父名忠固辭乃拜諫議大夫知制誥開元初復拜中書舍人子至天寶末為中書舍人

玄宗幸蜀肅宗即位于靈武玄宗遣至為傳位冊文玄宗歎曰昔先帝遜位於朕冊文則卿之先父所為今朕以神器付儲君卿又當演誥可謂繼美矣

韋斌天寶中拜中書舍人其兄陟先為中書舍人而斌又繼遷時人美之

韋見素天寶五年為諫議大夫充江西山南黔中嶺南黔陟使還拜給事中改尚書左丞吏部侍郎子倜諤皆至給事中孫顛以廕補千牛累遷給事中尚書左丞吏

部侍郎

于休烈嗣子益次子肅相繼為翰林學士

孫成父逖兄宿繼掌綸言三十年間更番西掖時論榮  
之

盧奕懷慎之少子也天寶十一年為御史中丞始懷慎  
及與並為此官父子三人為中丞清節不易時人美之  
郭英乂隴右節度使知運之季子也少以父業習知武  
藝策名河隴間以軍功累遷諸衛員外將軍至德初肅

宗興師朔野英又以將門子特見任用遷隴右節度使  
崔渙乾元中累遷御史大夫子縱德宗建中中為大理  
少卿魏州都糧料使與李懷光同赴奉天拜京兆尹懷  
光反德宗行幸梁州或曰縱素善懷光今不來矣帝曰  
縱吾能保其心不數日縱至拜御史大夫

張守珪字獻誠守珪弟守瑜守瑜子獻恭並為山南西  
道節度使

李峴肅宗幸靈武應召至行在拜扶風太守兼御史大

夫既收京師拜禮部尚書守京兆尹復兼御史大夫時  
峴兄峘為戶部尚書兼成都尹乾元初玄宗還京自蜀  
至又兼御史大夫兄弟俱判臺事國初已來兄弟並拜  
大夫未有其比

李希言為禮部侍郎子紆代宗大厯中亦歷禮部侍郎  
崔祐甫德宗初為門下侍郎平章事轉中書侍郎平章  
事修國史祐甫子植穆宗長慶初拜中書侍郎平章事  
鄭絀貞元中為起居郎絀孫顥懿宗咸通中為起居郎

李晟貞元中為鳳翔節度子愬憲宗元和中為隨唐鄜  
節度既平蔡州憲宗有意收復河湟故地授愬鳳翔節  
度使路繇闕下會李師道再叛詔徵兵討之遂改愬為  
徐泗節度與兄愿交換其城旬日間再踐父兄之任弟  
聽文宗開成中授鳳翔節度使父晟兄愬兄愿皆鎮鳳  
翔時人榮之

鄭餘慶貞元十三年為工部侍郎子澣穆宗長慶中遷  
中書舍人文宗太和二年遷禮部侍郎餘慶憲宗元和

中為山南西道節度觀察使興元尹太和中瀚自左丞  
出為山南西道節度觀察使興元尹餘慶之鎮興元創  
儒宮設學館至瀚來復繼前美瀚子處誨累遷工部刑  
部侍郎又遷宣武軍節度使處誨弟從謹宣宗大中中  
遷中書舍人懿宗咸通三年拜禮部侍郎轉刑部又為  
宣武軍節度使以兄歿於宣武訖致政不於公署舉樂  
王緯字文卿父之咸初為長安尉緯舉明經又書判入  
等歷長安縣尉

杜佑再為淮南節度貞元十九年入朝拜檢校司空同  
平章事順宗即位初進檢校司徒憲宗時再拜司徒平  
章事佑孫恂武宗會昌中拜中書侍郎同平章事尋出  
鎮西川俄復入相加司空繼加司徒復歷淮南節度

竇常憲宗元和中為國子祭酒弟牟穆宗長慶初亦為  
國子祭酒

孔戣元和中自華州刺史入為大理卿穆宗長慶中自  
吏部侍郎為右散騎常侍弟戢自汝州刺史為大理卿



湖南觀察為右散騎常侍

令狐楚為職方員外郎知制誥元和九年入翰林遷中書舍人十二年罷內職守中書舍人十四年自河陽節度入拜中書侍郎同平章事楚子絢宣宗大中二年考功郎中知制誥其年入翰林拜中書舍人四年拜兵部侍郎平章事絢子渙位至中書舍人翰林學士

薛存誠自兵部郎中為給事中子廷老自刑部郎中遷給事中廷老子保遜位至給事中

韓充中書令弘之弟為河陽昭義衙門將及弘節制宣  
武召歸主親兵軍中秦官累至御史大夫元和十五年  
代姪公武為廊坊節度使加檢校工部尚書穆宗長慶  
元年又自鄭滑節度充宣武軍節度使

張弘靖祖加貞為中書舍人相玄宗為中書令謚恭肅  
父延賞為中書舍人相德宗為左僕射平章事謚成肅  
弘靖亦為中書舍人復相憲宗

韋貫之穆宗長慶初為河南尹子渙咸通中為河南尹

鄭軍長慶四年遷御史中丞文宗太和九年為右僕射  
平章事加門下侍郎監修國史弟朗武宗會昌中為御  
史中丞宣宗大中中為禮部尚書平章事加中書侍郎  
監修國史

高鉞長慶四年正拜中書舍人充翰林學士如故文宗  
太和三年授刑部侍郎遷吏部侍郎弟銖開成三年自  
江西觀察入為刑部侍郎弟錯太和七年為中書舍人  
開成中轉吏部侍郎鉞子湜懿宗咸通中再為中書舍

人

崔郎為給事中敬宗即位選為翰林侍講學士轉中書舍人轉禮部侍郎子瑤累至中書舍人宣宗大中六年知貢舉旋拜禮部侍郎瑤弟瑾懿宗咸通中拜禮部侍郎郎弟鄆太和三年以考功郎中充翰林學士轉中書舍人

路羣文宗太和四年為翰林學士五年正拜中書舍人子巖宣宗大中中累遷中書舍人

高元裕開成三年為諫議大夫充翰林侍講學士兄少  
逸開成四年遷諫議大夫代元裕為翰林侍講學士兄  
弟迭處禁密儒林榮之

李德裕自淮南節度使授門下侍郎同平章事初德裕  
父吉甫年五十一出鎮淮南五十四自淮南復相德裕  
鎮淮南復入相一如父之年亦為異事

崔珙武宗會昌初累遷戶部侍郎充諸道鹽鐵轉運等  
使弟璠宣宗大中初為兵部侍郎充諸道鹽鐵轉運使

璪弟興大中七年權知戶部侍郎轉兵部侍郎

張楊以宣宗大中中宰相于琮判度支名為司勳員外郎判度支尋用為翰林學士轉郎中知制誥拜中書舍人戶部侍郎學士承旨于文蔚昭宗乾寧中以祠部郎中知制誥正拜中書舍人崔胤與文蔚同年進士尤相善用為翰林學士戶部侍郎

王龜懿宗咸通中為浙東觀察使兄式宣宗大中時廉問于此曾破草賊裴甫亦著善政至是越人咸喜焉

後唐趙彜唐僖宗光啓中為陳州刺史其後彜弟昶珩  
皆相繼為陳帥

封舜卿莊宗同光已來累歷清顯封氏自太和以來世  
居兩制以文筆稱於時舜卿從子渭昭宗遷雒時為翰  
林學士舜卿為中書舍人叔姪對掌內外制從子翹於  
梁貞明中亦為翰林學士

劉遂清末帝清太元年以前興州刺史為西京副留守  
代其兄遂雍為淄州刺史

卷之三

三

三



冊府元龜卷七百七十一

欽定四庫全書

冊府元龜卷七百七十二 宋 王欽若等 撰

總錄部

志節

男子之生懸弧於門示將有事於四方也蓋古之志士  
樹勲於世揚名於後者未始不懷慷慨之操勵剛果之  
節因事感發挾義個儻或塊處窮約或遭罹困辱而能  
壯圖內激英槩外見發乎心術形於話言卒能踐之斯

可復也至有服膺刻意研味前說矯尾厲角歷干當世  
不喜卑冗之役無事貴游之樂輕章句之誦習慕豪英  
之風軌專講王霸之術好論將帥之事靡尚細節罔循  
常檢是皆魁梧磊落之人也豈齷齪廉謹云乎哉

申包胥楚大夫初與伍員為友伍員之亡也謂包胥曰

我必復楚國

復報也

包胥曰勉之子能復之我必能興之

及昭王在隨包胥如秦乞師

吳起衛人少時家累千金游仕不遂遂破其家鄉族笑

之吳起殺其謗已者三十餘人而東出衛郭門與其母  
訣齧臂而盟曰起不為卿相不復入衛後為楚相

蘇秦者東周雒陽人也東事師於齊習之於鬼谷先生

潁川陽城有鬼谷蓋是其所居因為  
號風俗通曰鬼谷先生六國時從橫家 出游數歲大困

而歸兄弟嫂妹妻妾皆笑之曰周人之俗治產業力工  
商什二以為務今子釋本而事口舌困不亦宜乎蘇秦  
聞之而慙自傷乃閉室不出出其書徧觀之曰夫士業  
已屈首受書而不能以取尊榮雖多亦奚以為於是得

周書陰符伏而讀之期年以出揣摩

戰國策曰乃發書陳篋數十得太公

陰符之謀伏而誦之簡練以為揣摩讀書欲腫引錐自刺其股血流至踵曰安有說人主不能出其金帛錦綉

取卿相之尊者乎期年揣摩曰此可以說當世之君矣後

佩六國相印終齊客卿

張儀者衛人也始嘗與蘇秦俱事鬼谷先生學成游說

諸侯嘗從楚相飲已而楚相亡壁門下意張儀曰儀貧

無行此必盜相君之璧共執張儀掠笞數百不服釋之

其妻曰嘻子女讀書游說安得此辱乎張儀謂其妻曰

視吾古尚在否其妻笑曰古在也儀曰足矣後終於秦相

蔡澤者燕人也游學于諸侯小大甚衆不遇而從唐舉

相

荀卿曰梁有唐舉

曰吾聞先生相李兌曰百日之內持國秉

政有之乎曰有之曰若臣者何如唐舉熟視而笑曰先

生曷鼻巨肩

徐廣曰曷一作偁偁一作抑巨一作渠

魁顏蹙髑膝藥

藥兩膝曲

也吾聞聖人不相殆先生乎蔡澤知唐舉戲之乃曰富

貴吾所自有吾所不知者壽也願聞之唐舉曰先生之

壽從今以往者四十三歲蔡澤笑謝而去謂其御者曰

吾持梁刺齒肥

持梁作飯也刺齒二字當作齧又作齒也

躍馬疾驅懷黃金

之印結紫綬於腰揖讓於人主之前食肉富貴四十三年足矣後為秦相

李斯者楚上蔡人也年少時為郡小吏見吏舍廁中鼠食不潔近人犬數驚恐之斯入倉觀倉中鼠食積粟居大廡之下不見人犬之憂於是李斯乃歎曰人之賢不肖譬如鼠矣在所自處耳乃從荀卿學帝王之術學已

成度楚王不足事而六國皆弱無可為建功者欲西入  
秦辭於荀卿曰斯聞得時無怠今萬乘方爭時游者主  
事今秦王欲吞天下稱帝而治此布衣馳騫之時而游  
說者之秋也處卑賤之位而計不為者此禽鹿視肉人  
面而能彊行者耳故詬莫大於卑賤而悲莫深於窮困  
久處卑賤之位困苦之地非世而惡利自託於無為此  
非士之情也始皇時斯位至丞相

陳勝陽城人少時嘗與人傭耕輟耕之壟上悵悵久之



曰苟富貴無相忘傭者笑而應曰若為傭耕何富貴也  
勝太息曰嗟乎燕雀安知鴻鵠志哉

漢陳平陽武戶牖人貧不事業一縣中盡笑其所為里

中社平為宰

主切割肉也

分肉甚均里父老曰善陳孺子之

為宰平曰嗟乎使平得宰天下亦如此肉後為丞相

韓信淮陰人家貧母死無以葬迺行營高燥地令傍可

置萬家者

言其有大志也

後為淮陰侯

朱買臣字翁子吳人也嘗刈薪樵賣以給食擔束薪行

且讀書其妻亦負載相隨數止買臣無歌謳道中買臣  
愈益疾歌妻羞之求去買臣笑曰我年五十當貴今已  
四十餘矣苦女日久待我富貴報女功後為會稽太守  
丞相長史

主父偃臨淄人也上疏言事遷謁者中郎中大夫大臣  
皆畏其口賂遺千金或說偃曰大橫偃曰臣結髮游學  
四十餘年身不得遂親不以為子昆弟不收賓客棄我  
我院日久矣丈夫生不五鼎養則五鼎烹耳後為齊相

誅

朱雲字游平陵人事蕭望之受論語皆能傳其業好個  
儻大節當世以是高之終於槐里令

趙充國字翁孫隴西人為人沈勇有大畧好將帥之節  
而學兵法通知四夷事為後將軍卒

段會宗字子松天水上邽人會宗為人好大節矜功名  
位至左曹中郎將光祿大夫

終軍者濟南人也初從濟南當詣博士步入闕闕吏予

軍繻

繻帛邊也舊闕出入皆以傳煩因裂繻頭合以為符信也

軍問以此何為吏曰

為復傳

復返也謂返出闕吏以為傳

還當以合符軍曰丈夫西游終

不復傳還棄繻而去軍為謁者使行郡國建節東出闕

闕吏識之曰此使者迺前棄繻生也

班伯為奉車都尉與王許子弟為羣在於綺襦紈袴之間非其好也

翟方進字子威汝南上蔡人家世微賤年十二三失父孤學給事太守府為小史號遲頓不及事數為掾史所

詈辱方進自傷迺從汝南蔡父相問已能所宜

言從何術藝可

以自達

蔡父大奇其形貌謂曰小史有封侯骨當以經術

進努力為諸生學問方進既厭為小史聞蔡父言心喜  
因病歸家辭其後母欲西至京師受經方進讀經博士  
受春秋積十餘年經學明習徒衆日廣諸儒稱之以射  
策甲科為郎

後漢耿弇少好學父況為朔調連率弇嘗見郡尉試騎  
士建旗鼓隸馳射繇是好將帥之事後終建威大將軍

王霸世好文法父為郡決曹掾霸亦少為獄吏嘗慷慨  
不樂吏職其父奇之遣西學長安後終於上谷太守

馬援年十二而孤少有大志諸兄奇之嘗受齊詩意不  
能守章句乃辭兄況欲就邊郡田牧況曰汝大才當晚  
成良工不示人以樸且從所好後為伏波將軍封新息  
侯援曰方今匈奴烏桓尚擾北邊欲自請擊之男兒要  
當死于邊野以馬革裹屍還葬耳何能卧牀上在兒女

子手中耶

馮衍字敬通幼有奇才二十而博通羣書王莽時諸公多薦舉之者衍辭不肯仕然有大志不戚戚於貧賤居嘗慷慨歎曰衍少事名賢經歷顯位懷金垂紫揭節奉使不求苟得嘗有凌雲之志三公之貴千金之富不得其願不概於懷貧而不衰賤而不憾年雖疲曳猶庶幾名賢之風修道德於幽冥之路以終身名為後世法居貧年老卒于家衍官至司隸從事

鄧訓字平叔禹第六子也少有大志不好文學禹常非

之訓終於護羌校尉

郭丹從師長安買符入函谷關乃慨然歎曰丹不乘使者車終不出關既至京師嘗為都講諸儒咸敬重之大司馬嚴尤請丹辭病不就王莽又徵之遂與諸生逃于北地更始一年三公舉丹賢能徵為諫議大夫持節使歸南陽安集受降丹去家十有二年果乘高車出關如其志焉

梁竦安定人高山侯統子也竦言生長京師不樂本土



自負其才鬱鬱不得意嘗登高望遠歎息言曰大丈夫居世生當封侯死當廟食如其不然閒居可以養志詩書足以自娛州郡之職徒勞人耳後辟命交至並無所就

梁慳有勇氣嘗慷慨好功名官至謁者

第五倫為京兆督鑄錢掾每讀詔書嘗歎息曰此聖主也一見決矣等輩笑之曰爾說郡將尚不下安能動萬

乘乎

華嶠書曰蓋延代鮮于辱為馮翊多非法倫數切諫延憾之故滯不得舉郡將謂郡守

倫曰

未遇知己道不同故耳位至司空

班超為人大志不修細節然內孝謹居家常執勤苦  
不恥勞辱與母隨至雒陽家貧嘗為官傭書以供養久  
勞苦嘗輟業投筆歎曰大丈夫無它志畧猶當效傅介  
子張騫立功異域以取封侯安能久事筆硯間乎左右  
皆笑之超曰小子焉知壯士志哉後為西域都護封定  
遠侯

趙曄會稽山陰人也少嘗為縣吏奉檄迎督郵曄恥於

廝役遂棄車馬去到健為資中

資中縣名今資州資陽縣

詣杜撫受

韓詩究竟其術撫卒乃歸州召補從事不就

楊震嘗客居于湖不答州郡禮命數十年衆人謂之晚  
暮而震志愈篤後位至太尉

徐淑交接英雄嘗有壯志舉茂才除渤海修令遷琅瑯  
都尉

趙溫為京兆郡丞嘆曰大丈夫當雄飛安能雌伏遂棄  
官去

盧植從馬融學終辭歸闔門教授性剛毅有大節嘗懷濟世志後為議郎

張奐少立志節嘗與士友言曰大丈夫處世當為國家立功邊境及為將帥果有勲名為度遼將軍轉太常卒馮良字君郎出於孤微少作縣吏年三十為尉從佐奉檄迎督郵即路慨然恥在廝役因壞車殺馬毀裂衣冠乃遁至犍為從杜撫學

戴封年十五詣太學師事鄧令東海申君申君卒送喪

到東海道當經其家父母以封當還豫為娶妻封暫過  
拜親不宿而去還京師卒業後為中山相徵拜為太常  
卒

郭泰字林宗家世貧賤早孤母欲使給事縣廷林宗曰  
大丈夫安能處斗筲之役乎遂辭就成臯屈伯彥學後  
以有道徵不就

符融少為都官從事主察舉百官犯法者融恥為其吏  
而去後游太學師事少府李膺

范冉

冉或作丹

少為縣小吏年十八奉檄迎督郵冉恥之乃

遁去游學後為萊蕪長不到官卒

陳蕃年十五嘗閒處一室而庭宇蕪穢父友同郡薛勤來候之謂曰孺子何不洒掃以待賓客蕃曰大丈夫處世當掃除天下安事一室乎勤知其有清世志甚奇之位至太尉

逢萌家貧給事縣為亭長時尉行過亭萌候迎拜謁既而擲楯歎曰大丈夫安能為人役哉遂去之長安學通

春秋經後隱於勞山連徵不起卒

周黨家產千金少孤為宗人所養而遇之不以禮及長又不還其財黨詣鄉縣訟主乃歸之既而散與宗族悉免遣奴婢遂至長安游學建武中徵為議郎以病去職杜密字周甫潁川陽城人也為人沈實少有厲俗志後為太僕黨事既起免歸本郡

岑晳南陽棘陽人也雖在閭里慨然有董正天下之志後太守宏農成瑁請為功曹

范滂少厲清節為州里所服舉孝廉光祿四行時冀州  
飢荒盜賊羣起乃以滂為清詔使案察之滂登車攬轡  
慨然有澄清天下之志

王允少好大節有志於立功嘗習誦經傳朝夕試馳射  
三公並辟以司徒高第為侍御史

鄭玄年十一二隨母還家正臘會同列十數皆美服盛  
飾語言閒通玄猶漠然如不及母私督數之乃曰此非  
我志不在所願也後徵司農卿不就



魏夏侯稱字叔權征西將軍淵之子也自孺子而好合  
聚童兒為之渠帥戲必為軍旅戰陳之事有違者輒嚴  
以鞭笞衆莫敢逆淵陰奇之使讀項羽傳及兵書不肯  
曰能則自為耳安能學人與文帝為布衣之交年十八  
卒

婁圭字子伯少有猛志嘗歎息曰男兒居世會當得數  
萬兵千匹騎著後耳儕輩笑之後詣太祖以為大將  
鄧艾少時每見高山大澤輒規度指畫軍營處所時人

多笑焉後位至征西將軍

留贊字正明會稽長山人為郡吏與黃巾賊帥吳桓戰  
手斬得桓贊一足被創遂屈不伸然性烈好讀兵書及  
三史每覽古良將戰攻之勢輒對書獨歎因呼諸近親  
謂曰今天下擾亂英豪並起歷觀前世富貴非有恒人  
而我屈臂在閭巷之間存亡無以異今欲割引吾足幸  
不死而足伸幾復見用死則已矣親戚皆難之有問贊  
乃以刀自割其筋血流滂沱氣絕良久家人驚怖亦以

既爾遂引伸其足足伸創愈以得蹉步凌統聞之請與相見甚奇之乃表薦贊遂被試用

賈逵字梁道自為兒童戲弄嘗設部伍祖父習異之曰汝大必為將率口授兵法數萬言終於豫州刺史

黃朗字文達沛郡人也為人弘通有信實父為本縣卒朗感其如此抗志游學繇是為方國及其郡士大夫所禮特異

裴潛少時不為父所知又自感所生微賤無舅氏又為

父所不禮即折節仕進雖多所更歷清省恪然後為光祿大夫卒

蜀姜維字伯約天水冀人也少孤與母居好鄭氏學為人好立功名陰養死士不修布衣之業後為大將軍

吳呂蒙字子明汝南富陂人也少南渡依姊夫鄧當當為孫策將數討山越蒙年十五六竊隨當擊賊當顧見大驚呵叱不能禁止歸以告蒙母母恚欲罰之蒙曰貧賤難可居脫誤有功富貴可致且不探虎穴安得虎子

母哀而舍之後為南郡太守

黃蓋少孤嬰丁凶難辛苦備嘗然有壯志雖處貧賤不自同於凡庸嘗以負薪餘閒學書疏講兵事後為偏將軍

潘璋東郡人性博蕩居貧好賒酤債家至輒言後豪富相還後為右將軍

張奮昭之弟也年二十造作攻城大攻車為步騭所薦昭不願曰汝年尚幼何為自委於軍旅乎奮對曰昔童

汪死難子竒治阿奮實不才耳於年不為少也遂領兵馬將軍連有功效至平州都督封樂鄉亭侯

晉杜預字元凱京兆杜陵人也祖畿魏尚書僕射父恕幽州刺史預博學多通明於興廢之道常言德不可以企及立言可庶幾也後為鎮南大將軍都督荊州諸軍事

王濬恢廓有大志嘗起宅開門前路廣四十步人或謂之何太過濬曰吾欲使容長戟幡旗衆咸笑之濬曰陳勝

有言燕雀安知鴻鵠之志後為撫軍大將軍

劉卞字叔龍東平須昌人也本兵家子質直少言少為縣小吏功曹夜醉如廁使卞執燭不從功曹銜之以他事補亭子卞後從令至維得入太學試經為臺四品吏訪問令寫黃紙一麻車卞曰劉卞非為人寫黃紙者也訪問知怒言於中正退為尚書令史或謂卞曰君才簡畧堪大不堪小不如作守

行守之義

舍人卞從其言後為吏

部令史遷齊王攸司空主簿

魏舒字陽元任城樊人也少孤為外家甯氏所養甯氏起宅相宅者云當出貴甥外祖母以魏氏甥小而慧意謂應之舒曰當為外氏成此宅相久乃別居年四十餘郡上計掾察孝廉宗黨以舒無學業勸令不就可以為高耳舒曰若試而不中其負在我安可虛竊不就之高以為己榮乎於是自課百日習一經因而對策升第除灑池長

趙至字景真代郡人也寓居雒陽蘇氏令初到官至年



十三與母同觀母曰汝先世本非微賤世亂流離遂為  
士伍耳爾後能如此不至感母言詣師受業聞父耕叱  
牛聲投書而泣師怪問之至曰我小未能榮養使老父  
不免勤苦師甚異之年十四遊太學後占籍遼西舉郡  
計吏到雒與父相遇時母已亡父欲令其官立弗之告  
仍戒以不歸至乃還遼西幽州三辟部從事斷九獄見  
稱精審太康中以良吏赴雒方知母亡初至自恥士伍欲  
以官學立名期於榮養既而其志不就號憤慟哭嘔血

而卒

左思少學鍾胡書及鼓琴並不成父雍謂友人曰思曉  
解不及我少時思遂感激勤學兼善陰陽之術貌寢口  
訥而詞藻壯麗不好交游惟以閑居為事思嘗為秘書  
郎

陳頥字延思陳國苦人也少好學有文義父訢立宅起  
門頥曰當使容馬車訢笑而從之後州辟部從事乘馬  
車還家宗黨榮之

李矩字世迴平陽人也童亂時與羣兒聚戲便為其率計畫指授有成人之量後終於征西將軍司州刺史

易雄字興長沙瀏陽人也少為縣吏自念卑賤無繇自達乃脫幘挂縣門而去因習律令及施行故事交結豪右州里稍稱之後為春陵令

丁紹為冀州刺史自以為才足為物雄當官蒞政每事克舉視天下之事若運於掌握遂慨然有董正四海之志矣是時王浚盛於幽州苟晞盛於青州然紹視二人

茂如也永嘉三年暴疾而卒臨終嘆曰此乃天亡冀州  
豈吾命哉

閻纘不護細行而慷慨多大節後終於漢中太守

劉琨少負志氣有縱橫之才善交勝已頗浮誇與范陽  
祖逖為友聞逖被用與親故書曰吾枕戈待旦志梟逆  
虜嘗恐祖生先吾著鞭其意氣相期如此後為幽州刺  
史

王恭字伯孝光祿大夫蘊子定皇后之兄也少有美譽

清操過人自負才地高華嘗有宰輔之望讀左傳至奉  
王命討不庭每輟卷而歎起家為著作郎歎曰仕宦不  
為宰相才志何足以騁因以疾辭後為輔國將軍

劉殷性至孝時人嘉其至性通感競以穀帛遺之殷受  
而不謝直云待後貴當相酌耳性倜儻有濟世之志儉  
而不陋清而不介望之頽然而不可侵也鄉黨親族莫  
不稱之後仕劉聰至太保

夏統字仲御會稽永興人也幼孤貧養親以孝聞睦於

兄弟每採梠求食星行夜歸或至海邊拘蠨蟻以資養  
雅善談論宗族勸之仕謂之曰卿清亮質直可作郡網  
紀與府朝接自當顯至如何甘辛苦於山林畢性命於  
海濱也統勃然作色曰諸君待我乃至此乎使統屬太  
平之時當與元凱評議出處遇濁代念與屈生同污共  
泥若污隆之間自當耦耕沮溺豈有辱身曲意於郡府  
之間乎聞君之談不覺寒毛盡戴白汗四匝顏如渥丹  
心熱如炭舌縮口張兩耳壁塞也言者大慙

祖逖與劉琨俱為司州主簿情好綢繆共被同寢中夜聞荒雞鳴蹴琨覺曰此非惡聲也因起舞逖琨並有英氣每語世事或中宵起坐相謂曰若四海鼎沸豪傑並起吾與足下當相避於中原耳琅琊王拓定江南未遑北伐乃以逖為奮威將軍豫州刺史逖渡江中流擊楫而誓曰祖逖不能清中原而復濟者有如大江辭色壯烈衆皆慨嘆

王導從元帝鎮建康過江人士每至暇日相要出新亭

飲宴周顛中坐而歎曰風景不殊舉目有江河之異皆相視流涕惟導愀然變色曰當戮力王室克復神州何至作楚囚相對泣邪衆收泪而謝之導位至宰相

陶侃嘗語人曰大禹聖者乃惜寸陰至於衆人當惜分陰豈可逸遊荒醉生無益於時死無聞於後是自棄也後為廣州刺史在州無事輒朝運百甓於齋外暮運於齋內人問其故答曰吾方致力中原過爾優逸恐不堪事其勵志勤力皆此類也



谷儉桂陽人中興初以學校陵遲特聽不試孝廉而秀才依舊策試甘卓為湘州刺史備禮舉儉為秀才儉辭不獲命州厚禮遣之諸州秀才聞當考試皆憚不行惟儉一人到臺遂不復策試儉恥其州少士乃表求試以高第除中郎儉少有志行寒苦自立博涉經史于時南土凋荒經籍道息儉不能遠求師友惟在家研精雖所得實深未有名譽又恥銜耀取達遂歸終身不仕卒於家

孔安國羣從諸兄並乏才名以富強自立惟安國與兄  
汪少厲孤貧之操汪既以直亮稱安國亦以儒素顯後  
歷尚書左右僕射卒

劉毅字希樂少有大志不修家人產業後為衛將軍荆  
州刺史

魏詠之生而免缺年十八聞荊州刺史殷仲堪帳下有  
名醫能療之貧無行裝謂家人曰殘醜如此用活何為  
遂齋數斛米西上以投仲堪既至造門自通仲堪與語

嘉其盛意名醫視之醫曰可割而補之但須百日進粥不得語笑詠之曰半生不語而有半生亦當療之況百日邪仲堪於是處之別室令醫善療之詠之遂閉口不言惟食薄粥其厲志如此及差仲堪厚資遣之後為荊

州刺史

前趙劉宣師事樂安孫炎學成而返不出門閤蓋數年每讀漢書至蕭何鄧禹傳未曾不反覆詠之曰大丈夫若遭二祖終不令兩公獨擅美於前矣晉武時為右部

都尉

前秦王猛字景畧隱於華陰山懷佐世之志希龍顏之主斂翼待時候風雲而後動後為苻堅丞相

宋蒯恩蘭陵人高祖征孫恩縣差恩為征民使伐馬芻恩嘗負大束兼倍餘人每捨芻於地嘆曰大丈夫彎弓三石奈何充馬士高祖聞之即給器仗恩大喜自征妖賊嘗為先登後為世子司馬

傅弘之少倜儻有大志為本州主簿舉秀才不行

劉鍾字世之彭城人也少孤依鄉人中山太守劉固共居幼有志力嘗慷慨於貧賤後從高祖征伐為右衛將軍

垣護之少倜儻不拘小節形狀短陋而氣幹強果從高祖征司馬休之為世子中軍府長史兼行參軍

王鎮惡年十三而苻氏敗亡關中擾亂流寓穀澠之間嘗寄食澠池人李方家方善遇之謂方曰若遭遇英雄主要取萬戶侯當厚相報方答曰君丞相孫人才如此

何患不富貴至時願見用為本縣令足矣鎮惡終於安  
西將軍

劉湛弱年便有宰世志嘗自比管夷吾諸葛亮不為文章不喜談議本州辟主簿不就除著作佐郎又不拜後位至丹陽太守

宗慤字元幹南陽人也叔父炳高尚不仕慤方少時炳問其志慤曰願乘長風破萬里浪炳曰汝不富貴即破我家矣後為雍州都督

沈攸之慶之從子也攸之初詣領軍將軍劉遵考求補  
白丁隊主遵考以為形陋不堪攸之歎曰昔孟嘗君身  
長六尺為齊相今求士取肥大者哉因隨慶之征討後  
為荊州刺史

曹景宗新野人頗受史書每讀穰苴樂毅傳輒放卷歎  
息曰大丈夫當如是

南齊垣崇祖少學騎馬及射或謂之曰武事可畏何不  
學書崇祖曰昔曹操曹丕上馬橫槊下馬談論此於天

下可不負飲食矣君輩無自全之伎何異犬羊乎

垣崇祖在淮陰見太祖自比韓信白起咸不信惟帝獨許之後為兗州大中正

李安民少有大志嘗歎曰大丈夫處世富貴不可希取三將五校何難之有太祖時位至中郎領軍封康樂侯王敬則臨淮射陽人也性倜儻不羈好刀劍嘗與暨陽吏鬪謂曰我若得暨陽縣當鞭汝小吏背吏唾其面且曰汝得暨陽縣我亦得司徒公矣敬則後自直閣將軍



補暨陽令昔日鬪吏亡叛令出遇之甚厚曰我已得暨陽縣汝何時得司徒公邪

樊遜字孝謙河東北猗氏人也遜少學嘗為兄仲所優饒既而自責曰名為人弟獨受安逸可不愧於心乎欲同勤事業母馮氏謂之曰汝欲謹小行邪遜感母言遂專心典籍嘗書壁作見賢思齊四字以自勸勉後寓居鄴中為臨漳小吏縣令裴鑑擢為主簿

王儉少時便有宰臣之志賦詩云稷契贊虞夏伊呂翼

商周及生子字曰元成取世仍作相之義後為衛將軍  
尚書令

梁吉士瞻字梁客馮翊蓮勺人也少有志氣不事生業  
時徵士吳苞見其姿容勸以經學士瞻因誦鮑昭詩云  
豎儒守一經不足識行藏拂衣不顧後為西陽武昌二  
郡太守

馮道根廣平人本郡召為主簿不就曰吾當使封侯廟  
食安能為儒吏邪後為左右上將軍封侯

裴之橫字如岳之高第十三弟也少好賓游重氣俠不事產業之高以其縱誕乃為狹被蔬食以激厲之之橫歎曰大丈夫富貴必作百幅被遂與僮屬數百人於芍陂大營田墅俄致殷積簡丈在東宮聞而異之以為河東王常侍

陳吳明徹微涉書史天文孤虛畧通其妙頗以英雄自許高祖深奇之高祖受禪拜安南將軍

周文育本姓項氏年十一歲義興人周嘗養為己子命

兄子弘讓教之書計弘讓善隸書寫蔡邕勸學及古詩以遺文育不之省也謂弘讓曰豈能學此取富貴祇有仗槩耳弘讓壯之教騎射文育大悅後為鎮南將軍

魯廣達字遍覽吳州刺史悉達之弟也少慷慨志立功名位至中領軍

後魏崔亮父元孫為沈文秀所害亮時年十歲嘗依季父幼孫居家貧傭書自業時隴西李冲當朝任事亮從兄光往依之謂亮曰安能久事筆硯而不往託李氏也

彼家饒書因可得學亮曰弟妹飢寒豈可獨飽自可觀書於市安能看人眉睫

宋繇燉煌人繇生而父僚為張邕所誅繇少有志尚喟然謂妹夫張彥曰門戶傾覆負荷在繇不能銜膽自厲何以繼承先業遂隨彥至酒泉追師就學閉室誦書晝夜不倦博通經史諸子羣言靡不綜覽後終於安遠將軍

李曾趙郡人也郡辟功曹不就門人勸之曾曰功曹之

職雖是鄉選高第猶是郡吏耳北面事人亦何容易後  
終於趙郡太守

李瑒倣儻有大志好飲酒篤於親知每謂弟郁曰士大  
夫學問稽博古今而罷何用專經為老博士也後為鎮  
遠將軍岐州刺史

楊侃字士業播之子也頗愛琴書尤好計畫時播一門  
貴滿朝廷兒姪早通而侃獨不交游公卿罕有識者親  
朋勸其出仕侃曰苟有良田何憂晚歲但恨無才具耳

後終於右光祿大夫

王肅少而聰辯涉獵經史頗有大志位至揚州刺史  
傅永年二十餘有友人與之書而不能答請於叔父洪  
仲洪仲深讓之而不為報永乃發憤讀書涉獵經史兼  
有才華後位至光祿大夫

李苗少有節操志尚功名每讀蜀書見魏延請出長安  
諸葛不許嘗歎息謂亮無奇計及覽周瑜傳未曾不咨  
嗟絕倒後終冠軍將軍

夏侯道遷譙國人少有志操年十七父母為結婚韋氏  
道遷云欲懷四方之志不願取婦家人咸謂戲言及至  
婚日求覓不知所在於後訪問乃云逃入益州後為瀛  
州刺史卒

李業興上黨長子人少耿介志學精力雖在貧賤常自  
矜負若禮待不足縱屬權貴不為之屈後終於齊文襄  
王中外府諮議參軍

庫狄昌字恃德神武人也少便騎射有膂力膽氣壯烈



每以將帥自許

北齊高昂幼稚時便有壯氣長而倜儻父翼為求嚴師令捶撻昂不遵師訓專事馳騁每言男兒當橫行天下自取富貴誰能端坐讀書作老博士也後位至司徒公趙彥深年三歲母傅氏便孀居彥深五歲傅謂之曰家貧兒小何以能濟彥深泣而言曰若天哀矜兒大當仰報傳感其意對之流涕及彥深拜太常卿還母子相泣久之

魏收年十五頗已屬文及隨父赴邊好習騎射欲以武藝自達榮陽鄭伯調之曰魏郎弄戟多少收慙遂折節讀書以文章顯後為尚書右僕射

後周孟信廣川索盧人也家世貧寒頗傳學業信嘗曰窮則變變則通吾家世傳儒學而未有達官當絲儒非世務也遂感激棄書從軍

薛愷字景猷河東汾陰人也曾祖弘敞值赫連之亂率宗人避地襄陽愷早喪父家貧躬耕以養祖母有暇則

覽文籍時人未之竒也江表取人多以世族愷既羈旅  
不被擢用然負才使氣未嘗趨世祿之門左中郎將京  
兆韋潛度謂愷曰君門地非下身材不劣何不繫裾數  
叅吏部愷曰世胄躡高位英俊沈下僚古人以為歎息  
竊所未能也潛度告人曰此年少極慷慨但不遭時耳  
與族祖安都之子懷雋相善懷雋每曰汝還鄉里不營  
產業不肯取妻豈復欲南乎愷亦恬然自處不改其舊  
後為安東將軍

劉璠初仕梁為王國常侍非其好也璠少慷慨好功名志欲立事邊城不樂隨牒平進會宜豐侯蕭循出為北徐州刺史即請為輕車府主簿兼記室參軍後為華陽太守屬侯景渡江梁室大亂循以璠有才畧甚親委之時寇難繁興未有所定璠乃喟然賦詩以見志其末章曰隨會平王室夷吾成霸功虛薄無時用徒然慕昔風

太祖時為黃門侍郎儀同三司

宇文貴少從師受學嘗輟書歎曰男兒當提劍汗馬以

取公侯何能為博士也後為大將軍

王勵字醜與性忠果有才幹年十七從太祖嘗謂之曰  
為將坐見成敗者上也被堅執銳者次也勵曰意欲兼  
之太祖大笑後為千牛備身直長

李弼字景和遼東襄平人少有大志膂力過人屬魏室  
兵亂語所親曰丈夫生世會須履鋒刃平寇難安社稷  
以取功名安能碌碌依階資以求榮位後以戰功為柱  
國大將軍終於太師

楊寬少有大志每與諸童游處必擇高大之物而坐之  
見者咸異焉後終於梁州刺史

李遠字萬歲幼有器局志度恢然嘗與羣兒為戰鬥之  
戲指麾部分便有軍陣之法郡守見而異之召使更戲  
羣兒懼而散走遠持杖叱之復為向勢意氣雄壯殆甚  
於前郡守曰此小兒所為非恒人也及長涉獵書傳略  
知指趣而已官至柱國大將軍

蔡佑高平人少有大志與鄉人李穆布衣齊名嘗謂曰

大丈夫當建立功名以取富貴安能久處貧賤邪言訖  
各大笑後皆如其言位至宜州刺史

宇文深字奴于性鯁正有器局年數歲便累石為營伍  
并折草作旌旗布置行列皆有軍陣之勢父求遇見之  
乃大笑曰汝自然如此於後必為名將後終於司命中  
大夫

侯植其先家北地之三水為州郡冠族植少個儻有大  
節容貌奇偉武藝絕倫後為司倉下大夫

隋宇文慶字神慶沈深有器局少以聰敏見知周初受業東觀頗涉經史既而謂人曰書足記姓名而已安能久事筆硯為腐儒之業後終於源州總管

王誼字宜君河南雒陽人也父顯周鳳州刺史誼少慷慨有大志便弓馬遍覽羣言周閔帝時為左中侍上士于仲文父實仕周為大左輔仲文倜儻有大志氣調英拔當時號為名公子起家為趙王屬

宇文忻字仲樂本朔方人徙京兆祖莫豆干魏安平公



父貴周大司馬許國公忻幼而敏慧為童兒時與羣輩  
遊戲輒為部伍進止行列無不用命有識者見而異之  
年十二能左右馳射驍捷若飛嘗謂所親曰自古名將  
惟以韓白衛霍為美談吾察其行事未足多尚若使與  
僕竝時不令監子獨擅高名也其少小慷慨如此後為  
右領大將軍

崔廓字士元博陵安平人也少孤貧而母賤繇是不為  
邦族所齒初為里佐屢逢屈辱於是感激逃入山中遂

博覽典籍多所通涉山東學者皆宗之既還鄉里不應  
辟命

王頗好讀書又曉兵法益有縱橫之志每嘆不逢時嘗  
以公相自許後為王諒府諮議參軍

張定和字處謚京兆萬年人也少貧賤有志節初為待  
詔會平陳之役定和當從征無以自給其妻有嫁時衣  
服定和將鬻之妻靳固不與定和於是遂行以功拜儀  
同賜帛千匹遂棄其妻

沈光少驍捷大業中煬帝徵天下驍果之士以伐遼左  
光預焉同類數萬人皆出其下光將詣行在所賓客送  
至灞上者百餘騎光酌酒而誓曰是行也若不能建功  
立名當死於高麗不復與諸君相見矣後為折衝郎將  
元巖字君山好讀書不治章句剛鯁有器局以名節自  
許高祖受禪拜兵部尚書進爵平昌郡公

來護兒幼而卓犖初讀詩至擊鼓其鏜踴躍用兵羔裘  
豹飾孔武有力因捨書歎曰大丈夫在世當如是會為

國滅賊以取功名安能區區事事筆硯也羣輩驚其言而壯其志及長雄畧秀出志氣英邁涉獵書史不為章句學後位至開府儀同三司

唐房玄齡幼仕隋為隰城縣尉坐事除名爵爵不自得時天下方亂嘗慨然有安民濟時之志後位至司空

李靖涉獵書傳不為章句之學嘗云大丈夫若遇明君撥亂膺期當立功立事以取富貴耳後終於左僕射

竇威家世勲貴耽翫文史時諸兄竝以軍功致仕通顯

交結豪貴賓客盈門而威職掌閑散諸兄更謂威曰昔孔子積學成聖猶狼狽當時棲遑若此汝效此道復欲何求名位不達固其宜矣威笑而不答後終於內史令魏徵字元成鉅鹿曲城人也少孤貧落拓有大志不事生業好讀書多所通涉見天下漸亂尤屬意縱橫之說後為太子太師知門下省事

武士護太原人才器詳敏少有大節及長深沈多大畧每讀書見扶主立忠之事未嘗不三復研尋常以慷慨

揚名為志後終荊州都督

馬周字賓王少孤貧好讀書尤明詩傳而落拓不事生產不為州里所敬武德中補博州助教日飲醇酒不以講授為心刺史達奚恕屢加咎責乃拂衣游於曹汴之境復為浚儀令崔賢所辱周遂感激西游長安至新豐宿於逆旅主人惟供設諸商販而不顧周遂命酒一斗八升悠然獨酌主人翁深異之後為中書令兼太子右庶子

狄仁傑字懷英并州太原人也兒童時門人有被害者  
縣吏就詰之衆皆接對惟仁傑堅坐讀書吏責之仁傑  
曰黃卷之中聖賢備在猶不能接對何暇偶俗吏而見  
責邪後終於內史

褚無量杭州監官人也幼孤貧勵志好學家近臨平湖  
中有龍鬪傾里閉就觀之無量時年十三讀書晏然不  
動後為左散騎常侍皇太子侍讀

哥舒翰僮任俠好然諾年四十遭父喪客居西京為

長安尉不禮慨然發憤折節仗劍之河西後位至尚書  
左僕射同平章事

崔圓少孤貧志尚閎博好讀兵書有經濟宇宙之心後  
至黃門侍郎平章事

馬璘扶風人璘少孤落拓年二十因讀馬援傳至大丈  
夫當死於邊野慨然嘆曰豈使吾祖勲業墜於地乎乃  
仗劍從戎西至安西以奇功累遷左金吾衛員外將軍  
馬燧少嘗與諸兄讀書乃輟卷嘆曰天下將有事矣丈



夫當立功伐以濟四海安能矻矻為一儒也後位司徒兼侍中北平王

張建封兗州人頗愛屬文以立功名為已任後終於徐州節度使

李德裕幼有壯志苦心力學尤精西漢書左氏春秋恥與諸生從鄉賦不喜科試年纔及冠志業大成後位至太尉平章事

張仲武范陽人也少業左氏春秋擲筆為薊北雄武軍

使

梁趙犇鬻亂之時與隣里小兒戲於道左嘗分布行列  
為部伍戰陣之狀自為董帥指顧有節如夙習焉羣兒  
皆稟而從之無敢亂其行者其父目而異之曰吾家千  
里駒也必大吾門耳弱冠有壯節好功名後為忠武軍  
節度使

後唐袁象先性寬厚不忤於物幼遇亂慨然有憂時之  
意後為歸德軍節度使

晉李專美舊學為文以父拒唐昭宗時嘗應進士舉為  
覆試所落不許再入專美心愧之繇是不遊文場後終  
於大理卿

桑維翰字國僑雒陽人也父珙事河南尹張全義為客  
將維翰身短面廣殆非恒人既壯每對鑑自歎曰七尺  
之身安如一尺之面繇是慨然有公輔之望後位至中  
書令

冊府元龜卷七百七十二